

## San Pablo Filípolachi ereca jun pila

**Caque fiqui:** Filipo pueblobi chuminlari Pábloca duque laquirato, pansile yachi cala eremin jominlanue yape Diosichi pila micarito sonnano podeisa. Junni man neri Epafroditu mumun acori filípolu ereca jun calaca Páblochi tanjica jominue. Jun mate Páblori Roma pueblobi doraminue Diosichi fiqui micarinanun tenchi. Junni Epafrodítori Páblochibi féto, cala cuwatobi, quiyainue. Junni filípolari ya quiyan pun joeque meráto, wepanalainue. Junni Diosi mantimini Epafroditu quiyan pun jominca manse suwanue. Junni Epafroditu manseinunbi Páblori yaca Filípoca manherenue. Junni yaca manherenato, in pilacanan yabe peerenue Filípobi chuminlachi cuwasa.

In pilabi Páblori filípolaca duque seque micarinue Diosichi Tencachi mantate. 2:5-11-bi Jesucristoca uraran fiquica micarinue ya Diosi jominnan, epe tsachi itonan, mantá tan manhinunca. Jinsi duque uyan fiquibenan seque micarinue. In pilaca wata 58 tsansite chutenué.

<sup>1</sup> Páblobe Timotéobe in pilaca quilaquinayoe. Jesucristobe mantaiminla joto, Filipos pueblobi chuminlachi erechun pila quilaquinayoe. Jerale Jesucristochi sen tsachilachi, nula tala mantá tanlachi, jinsi Jesucristochi tsachi bolon tenchi trabajaquiminlachi erechun quilaquinayoe. <sup>2</sup> Chiquilachi Apa Diosibenan

Miya Jesucristobenan rocailainayoe yape yalari nulaca seque laquiralarasa. Nulaca wepanatuto pansi nenalarasa carilaquedeque rocailainayoe.

*Pablo Jesucristochi tsachilachi tenchi Diosibe rocainunca*

<sup>3</sup> Nulacari numasitiya mantenhitto, nulachi tenchi Diosibe acradeseimin joyoe. <sup>4</sup> Numasitiya Diosibe rocainato nulachi tenchinan son tito rocaimin joyoe. <sup>5</sup> Lari Jesucristoca pacá sen fiquica micarinasa, nulanan ayudaiminla joe. Nulari jun fiquica casale meránunle nechi laca ayudaiminla joe. <sup>6</sup> Diosiri nulaca se suwanae. Junni lari seque mirayoe tsanquinoca natiya peleituchunaeque. Jesucristo manpatano ma fecári nulaca jera se suwaniquichunae. Jun tenchi Diosibe acradeseimin joyoe.

<sup>7</sup> Nulacari duque laquirato tenca camin joyoe. Junto nulaca son tito tenca cano joyoda. La titiya quinasanan, nulari ayudaiminla joe. Lari dorasanan, Jesuca pacá sen fiquica micarinasan, jun fiqui tenchi beco páanasanan, Diosi laca laquirato cuidaimin joe. Junni tsan josanan, nulanan Diosibe peayudaiminla joe. <sup>8</sup> Diosiri mirae lari nulaca jeralelaca laquiraeque. Jesucristori laca nulaca duque, duque laquirasa carimin joe. <sup>9</sup> Junto nulachi tenchi Diosibe rocaimin joyoe. Fécarí duque laquiracaalaquisa, junsí tsaracari miralarasa rocaimin joyoe, <sup>10</sup> yape nulari ti fe sen jonunca wenteno podeilaisa. Tsan josa rocaiyoé yape nulari duque sen jolajosa. Tsanque sen jolajonari, Cristo manpatano mate monantiya nulaca

culpa patarino podeilaituchunae. <sup>11</sup> Jesucristo ayudainasa, seque nenamin talari jalajochunae. Tsan jalajonari, nulaca quiraminlari Diosica tsaracari sen joeque tenhito yaca duque se tilatichunae.

*Pablo Jesucristobe son tinunca*

<sup>12</sup> Acola, soquila, inte niyantiya ilainanunca milarara tenjae. La Jesucristoca paca sen fiquica micarinanun tenchi padeseinasanan, jun fiquiri nantanancari merainae. <sup>13</sup> Miyachi soldadola jeralela meracala joe lari Cróstochi jonun tenchi doraeque. Uyanla jeralelanan junca meracala joe. <sup>14</sup> Jesucristobe penenaminlari layanla la doranunca miito, sonba tenca ilainae. Miya Jesuri yalachi jeleca piyarinan, yalari natiya jeleratuto, Diosichi fiquica paniquilaquinae.

<sup>15-17</sup> Weyanla mantimini Cróstoca paca sen fiquica polarinato, laca pachi polariminla joe. Laca fécarí padeseisa carichique Cróstoca paminla joe. Yalari fiquichisiri micariminiae laca fe joyoe tichique. Weyanla mantimini Cróstoca paca fiquica seque tenca cato micariminiae. Laca duque laquirato, jun sen fiqui tenchi doraeque miito seque micariminiae. <sup>18</sup> Junni yape josa! Niya josatiya Cróstoca paca fiquica micarilaquinae. Sen tenca tan, o seiton tenca jototiya, Diosichi fiquica micarilaquinae. Junca lari duque son tiyoe.

Juntonan cason tino joyoe <sup>19</sup> lari se loichunaeque. Nula Diosibe rocailainasa, Jesucristochi Tenca laca ayudainasa, lari se loichunaeque mirayoe. <sup>20</sup> Numasitiya lari tsachilaca Cróstoca se

timiyamin jomanyoe. Junto amanachitiya Cristo tenchi natiya luratuto yaca se timiyano joyoeque mirayoe. Junni laca totelaquitunari, Cróstoca duque se tintsan jochunae laca manlarisa carinun tenchi. O laca totelaquinari, Cróstoca tsanquenan se tintsan jochunae lari jeleratuto puyaniinun tenchi. <sup>21</sup> Junni totaitutori Cróstochi tenchisiri sonnamin joichunae. Jansi totaitori fe son joichunae. <sup>22</sup> Intenan casonnatori, yachi tenchi ticatiya duque seque quito nenaichunae. ¿Junto tica fe munaraichunan? Natiya miitoyoe. <sup>23</sup> Palunan se joe. Puyanoca munarayoe Cróstobe pechuchun. Ya lachi tenchi fe se jochunae.

<sup>24</sup> Tsan josanan, lari puyatutori nulaca fe ayudaino podeiichunae. Ya nulachi tenchi fe se jochunae. <sup>25</sup> Juntonan mirayoe capuyano itoyoeque. Nulabe canenano joyoe nulaca fe seque quereisa carichun. Jansi Diosica fe quereito, fe son tilatichunae. <sup>26</sup> Jansi lari inbi nechi loto nulachica manjanan, nulari Jesucristobe duque pansi jolajochunae.

<sup>27</sup> Lari niyan inasatiya, seque nenalarana! Cróstoca pacá sen fiqui duque seque nенаса carimin fiqui jonan, nulanan jun tsanquenan seque nenalarana! Nula tsanque nenalaranari, lanan nulaca meránatori, seque nenalaraeque meránae. Lari nulaca quirabi janatori, o jatutori, nulacari jun tsanquenan sen fiquica meráno munarayoe. Nulari peleituto, sonban tenca jonola joe. Man parejori tenca canato, duque tenfenola yape uyanlanan joe chiquila quereinun fiquica tsa joeque tenhilaisa. <sup>28</sup> Junni nulaca pa

jominlaca natiya jele titulajona! Nula natiya jele titulajonari, ya pa jominlari nulaca manquirato tenhilaichunae casticainola joyoeque. Jinsi Diosi nulaca se larichunaequenan tenhilaichunae.

<sup>29</sup> Junni nulari Crístobe cayaica joto, junte nechi fécarí quintsan jochunae. Ya tenchi padeseintsan jochunae. Diosiri nulaca wentenue yape Cróstochi jonun tenchi padeseilaisa. <sup>30</sup> Lacari niyaque padeseinanunca nulari quiramin jominlanue. Amananan meralaquinæ tsanque capadeseinaeque. Jinsi nulanan jun tsanquenan Cróstochi jonun tenchi padeseilainae.

## 2

### *Cristo epe tsachi itonan mantá tan manhinunca*

<sup>1</sup> ¿Crístori nulaca sonba tenca suwaco? ¿Jinsi nulaca duque laquirato manpansi josa carico? ¿Diosichi Tenca nulachibi poco? ¿Nula tala laquiracaalaquinaco? <sup>2</sup> Tsanla jotori, laca tsaracari son josa carilaquina! Man tala man tala tenca calaquituna! Man parejori tenca cato, jinsi laquiracaato, man junni tenca cato nenalarana! Tsanque nenalaranari, lari tsaracari son joanae. <sup>3</sup> Jinsi isapun itolajona! Uyanlaca fe sen joyoe titulajona! Uyanlari nulaca fe jolajoeque tenca calaquina! <sup>4</sup> Jinsi tencachique munaranuncasiri tenca calaquituna! Uyanla munaranuncanan petenca calaquina!

<sup>5</sup> Jesucristo tenca cananun cuwenta, nulanan jun tsanquenan tenca calaquina! <sup>6</sup> Yari Diosi jotonan, Diosibe parejo cajochique tenfetunue. <sup>7</sup> Diosi jonunca purato, tsachi ito, peyun cuwenta

inue. <sup>8</sup> Tsachi ica jun jototiya, fe mantá tan tsachi joyoe titunue. Totaino jototiya, Diosica merámin jominue. Junsi corosibinan totainue. <sup>9</sup> Jun tenchi Diosiri yaca tsaracari mantá tan suwaca joe. Jerale uyanlaca duque fe josa carie yape <sup>10</sup> yachi cale jeralela jera telenhilaiza. Jamochi chuminla, tote chuminla, to tenpe chuminla, piyanlela yachi cale jera telenhilaichunae. <sup>11</sup> Jeralela palaquichunae Jesucristori piyanlaca mantamin Miya joeque. Jeralela tsanlatichunae yape Apa Diosicari tsara sen patsa joeque mirantsan josa.

### *Diosichi tsachilarit seno cuwenta jolajonunca*

<sup>12-13</sup> Junni nulanan labe meráminla jonan, nulaca laquirato payichinayoe. Lari nulabe pechusan, nulari laca merámin jominiae. Junni amanari lari nulabe peitosanan, laca fécarí meralaquina! Diosiri nulaca sen jono munarasa carimin joe. Junsi yanan nulaca sen jono podeisa carimin joe yape yachi tenca munate sen jola-josa. Junni yari tsan josanan, nulanan tsa se loca jochun duque tenfelaina! Fe joyoe tituto, Diosica duque jele tito, se lochun tenfelaina!

<sup>14</sup> Titiya quino jotori, beco patuto, junsi pacaatuto quinilaquina! <sup>15-16</sup> Culpa itolajochun tsan jolajona! Tsanla jotori, ti quira seiton tsachilachite chuminla jotonan Diosichi sen nalala jolajochunae. Diosica tennatuminlachite nenato, tseno cuwenta jolajochunae. Sonnasa carimin fiquica duque tennato, yalachi tenchi tseno cuwenta jolajochunae yape Diosichi minuca feno podeilaisa. Junni nulari tsanque

nenalaranari, lari Cristo manpatano mate duque son joanae. Nulaca seque micaricayoe; epe micaritiyoe tino podeiichunae.

<sup>17</sup> Nulari Diosibe cayaito, yachi tsachila jola-joe. Junni yachi tsachila joto tencachiqueca yachi cuwaminla joe. Junni lanan nulabe pecuwacain-yoe. Lari totainun tenchi nulari fe sele cuwacaino podeilainari, junca son tinoyoe. Jansi nulabe duque son tiyanae. <sup>18</sup> Junni nulanan labenan son tinola joe.

### *Timotéobe Epaafrodítobe*

<sup>19</sup> Miya Jesús tinari, Timotéoca nulachica moora ereno muquee yape yari nulaca miito quirasa. Yari inchi manjato, labe nulaca jera cuenta manquinasa, lari duque pansi joanae.

<sup>20</sup> Timotéori sen tsachi joe. Nulaca tsaracari duque laquirato, seque ayudaino munarachunae. Timotéosiri tsanke seque ayudaichunae.

<sup>21</sup> Weyanlari yalachi tenca munateri nenato, Crístochi mantate nenatuchi timinla joe.

<sup>22</sup> Timotéoca mantimini nulanan miralarae yari sen joeque. Nao apabe trabajaquimin cuwenta, labe peayudaimin joe. Jesucristoca pacá sen fiquica micarinasa, labe seque peayudaimin joe. <sup>23</sup> Jun tenchi yaca nulachica ereno muquee. Casaleri laca niyanlaquino jonunca miino muquee. Junca miisiri, aman Timotéoca ereno muquee. <sup>24</sup> Junni Miya Jesucristo ayudainan, lanan nulachica nanni ina jaichunae tenjae.

<sup>25</sup> Tsan jotonan, Epaafrodítocan nulachica manherentsan joeque tenca canayoe. Nulari yaca lachica ereca jominlae yape laca ayudaisa. Junni

lari Diosichi tenchi ticatiya quinasa, yanan lachi aco cuwenta joto labe peayudain, pepadesein, inaminhe. <sup>26</sup> Junni amanari Epafrodítori nulaca manquirabi jichi tinae. Nulari jera meraca jominlanue yari quiyanpun jominueque. Junni yari junca tenhito, nulachica manjichi tinae yape nulari laquilaitusa. <sup>27</sup> Junni yari duque quiyanpun jominhe. Puyachinaminhe. Junnasa Diosi mantimini yaca duque laquirato manse suwae. Lacanan Diosi laquiraminhe. Epafroditu puyaca jomanpari, lari nantanancari laqui jono jomin joinhie. Junni Diosiri yaca manse suwanato, lacanan laquiraminhe yape duque laquiitusa.

<sup>28</sup> Jun tenchi Epafrodítoca fécarí nulachica ereno muquee yape nulari yaca manquirato manson tilatisa. Junni nula laqui jominnan polarilaqueeque meráto, lanan wepananaminnan nasi pansi manhiichunae. <sup>29-30</sup> Junni Miya Jesucristobe duque acradeseinato, Epafrodítoca son tito facarilaquina! Yari Cróstochi tenchi titiya quinaminnan, casi puyawiyae. Junni yari puyano jototiya nulachi tenchi laca duque ayudaino munaraminue. Ya tsanlaca duque respataintsan joe.

### 3

#### *Jesucristoca quereito seino jonunca*

<sup>1</sup> Junni acola, soquila, nulari Miya Jesucristochi jotori, son tilatina! Nulaca numa micarica jun fiquica manan manmicarinori natiya luratiyoe. Lari nulaca jun fiquica manan manmicarinatori,

nulaca fe sonba tenca suwanayoe yape peleilaitusa.

<sup>2</sup> Junni seitonque quinaminlacari tencabe quiralaquinana! Yalari seiton susu cuwenta jolajoe. Yalari micarinato, itsantiminla joe: Diosichi tsachila ichun, israelítalachi mite quidoca porainola joe timinlae. Tsanque poraitosiri Diosichi tsachila intsan joe timinla joe.

<sup>3</sup> Tsanlatinasanan, chiquila mantimini Diosichi tsa tsachila jolajoyoe. Chiquilarí tenca mántanan se ichique tenfenoca jera telaquepoto, chiquilachi tencabiri Diosichi cale telenhito, Jesucristoca son tito, aman tsanhiminla Diosichi tsa tsachila jolajoyoe.

<sup>4</sup> Junni lanan yala cuwenta tenca mántanan tenfeto, sen joyoe tino podeino joinhie. Uyanlari tenca mánta sen joyoe latinari, lanan fécarí tsantino podeino joinhie. <sup>5</sup> Lacari israelita jonan, ochu ma tanca quidoca porelaquinue. Lari matu to Benjamín tinun israelítachi alica joyoe. Lachi apa, ayan, israelítala jonan, lanan israelita patsa joyoe. ¿Aman fariseo tinun israelítalari Diosichi mantá chutecaca fécarí tuca meráchique tenfeminla joco? Junni lari fariséonan jomanyoe.

<sup>6</sup> Jun mantaca merátumin joequeri monantiya laca culpa quino podeilaituchunae. Lari israelítalachi mite nenanoca tsara se joe timin joto, junca telaquepominlacari duque seitolajoe timin jomanyoe. Junto israelítalari Jesucristobe cayailainari, yalaca paito yalabe duque seiton jomanyoe.

<sup>7</sup> Junni lari tsan jomin jotonan, tsanque tenca mánta sen jochique tenfenanunca epe joe tito,

jera telaquepocayoe. Crístochisiri jochun junca jera telaquepocayoe. <sup>8</sup> Junni lachi Miya Jesucristobe cayaito nenano duque se joe. Uyan tala nenanoca tsaracari fécari se joe. Jun tenchi lari tenca mántanan sen jochique tenfenanunca jera telaquepocayoe yabe cayaito nenachun. Jesucristochi tenchi junca jera piyariniquyoe. Tiri petseca cuwenta jera telaqueponiquyoe yachi jochun. <sup>9</sup> Yachi tsachi jono muquee. Diosi laca sen joe tisa tenjae. Junto amanari Diosibe sen jochique la tenca mánta tenfetiyo. Yachi mantá chutecacanan meráchique tenfetiyo. Lari Crístobe cayaitosiri sen jono muquee. Laca yabe cayainan, Diosi sen joe tisa tenjae. <sup>10</sup> Crístochi tsachi jono muquee. Cristo mansonhito nenanun cuwenta, lanan sonba tenca ito nenano muquee. Ya cuwenta padeseito, junni ya puyaca jonan, lachi tencabinan jun cuwentanan jono muquee. <sup>11</sup> Junni yari mansonhinun cuwenta, lanan niyaquetiya jun tsanquenan mansonhiichunae.

### *Cristo cuwenta ichun tenfeno jonunca*

<sup>12</sup> Lari tsantinato numa tsanke jera seque nenamin joyoe titiyoe. Jera sen patsa natiya caitoyoe. Tsan josanan Jesucristori laca jera se suwachun caya josa, lanan seichique petenfenayoe. <sup>13</sup> Acola, soquila, lari tsara sen jono jotonan, catsanhitiyo. Junni lari itsanquinayoe: Numa poleca jonunca jera pansito, cajonunca tenca cato nenayoe. <sup>14</sup> Carerabi sujimin cuwenta tenfemin joyoe. ¿Aman jana carerabi sujiminlari premio cachique sujiminla joco? Junni lari Jesucristochi tsachi joto, fe seichique tenfenanari,

Diosiri yachi tobi premio tsanca lachi cuwachunae.

<sup>15</sup> Junni jerale seque miraminlari tsanque tenca cato nenanola joyoe. Uyan quiraque tenca calaquinari, Diosiri nulaca mantuisa carichunae. <sup>16</sup> Nisi miratotiya, jun fecári meráto man tencari cato nenalarasa.

<sup>17</sup> Acola, soquila, nulari la cuwenta nenalarana! Junsi uyanlari la cuwenta nenalaranari, yalaca seque tennalarana! <sup>18</sup> Duque tsachilari tsanque nenatuchi timinla joe. Yalaca wari nulabe numa pacayoe. Junni yalaca laquichi warenato manan mantsantichinayoe: Yalari seitonque nenato, Cristo corosibi puyaca juncia duque pa nenalarae. <sup>19</sup> Diosiri yalaca jera casticaquichunae. Diosicari tennatuto, finocari tennaminla joe. Lu tintsan jonunca pánatonan, se joe tito, pansi jonilajoe. Diosichi tobi jomincari natiya tennatuto, in tote jomincasiri tennaminla joe. <sup>20</sup> Chiquila mantimini Diosichi to tsachila jolajoyoe. Chiquilachi Miya Jesucristo se larimin joto, yari Diosichi tobi chue. Junni chiquilaria ya manpatano jonunca meralarayoe. <sup>21</sup> Yari chiquilachi pucaca canbiyaquichunae. Epe puca jomincanan yachi tsara sen puca cuwenta suwachunae. Yari duque sonban joto, ticatiya jeraleca mantano poden joe. Junni jun sonbabenan chiquilaca canbiyaquichunae yape ya cuwenta jolajosa.

## 4

### *Miya Jesucristo joto son tino jonunca*

<sup>1</sup> Junni acola, soquila, nulaca laquirato duque quirano munarayoe. Nulaca son timin joyoe.

Junsi nulaca micaricayoeque tenca cato, nulachi tenchi pansi joyoe. Junni nulari Miya Jesucrístoca seque quereito, natiya peleituto, sonba tenca jolajona!

<sup>2</sup> Junni Evodia, nube rocainayoe. Síntique, nubenán rocainayoe. Nula paluca Miya Jesucrístochi namala joto, man parejori tenca calaquina!

<sup>3</sup> Junsi labe seque petrabajaquimin acobenan rocainayoe. Nuri yala paluca soquilaca ayudaito manse pataride! Yalari laca duque peayudaimin jominlae. Yalanan, Cleméntenan, jinsi uyanlanan laca duque peayudaimin jominlae. Yalachi mununca Diosichi sonnanun pilabi chutecala joe.

<sup>4</sup> Nulari Miya Jesucrístochi tsachila joto, numasitiya son tilatina! Manan mantsantichinayoe: Son tito nenalarana! <sup>5</sup> Pataatuto, seque nenalarana! yape jeralela junca quirato tenhilaisa. Miya Jesucristo manpatano mari queloinae.

<sup>6</sup> Ticanantiya wepanatulajona! Ticatiya munaratori, Diosibe rocailaina! Acradeseinato rocailaina! <sup>7</sup> Nulari tsanque nenaminlacari Diosi wepanatuto pansi chusa carichunae. Diosiri niyaito tsanquimin jonunca monantiya miituntsan jochunae. Junni nulaca wepanatuto chusa carinato, nulachi tencaca isainachunae yape pansi chularasa. Jesucrístochi tsachila joto, pansi chularachunae.

### *Sencasiri tenca cano jonunca*

<sup>8</sup> Junni acola, soquila, man fiquinan cajoe. Sencasiri tenca calaquina! Tsarasi jonunca, laquiranunca, se tinunca tenca calaquina! Jelenquiran fiquica, encanainunca tenca calaquituna! Tsachi

mancaca tsara seque quinae latinari, yacari tenca calaquina! Ticatiya seque pantsan jonunca tenca calaquina!

<sup>9</sup> Junsí labe miica jonunca natiya pansiatura-jona! La micarica jonunca seque tenca cato ne-nalarana! Laca quiran, merán, quimin jominlae. Junto nulari la cuwentanan nenalarana! Tsanque nenalaranari, wepanatuto pansi chusa carimin Diosiri nulabenan penenachunae.

*Pablo Filípola epe cuwalaquinun tenchi acrade-seinunca*

<sup>10</sup> Nulari numari cala lachi eretuto, aman man-herelaquinue yape lari ti munaranuncatiya casa. Junca lari Miya Jesucristochi tsachi joto duque son tinayoe. Junni ya calacari nulari numarile nechi cuwano munarattonan, niyaquenantiya ereno podeica itomin jominlanue. <sup>11</sup> La tsantinatonan, lachi cala falta jonun tenchi tsanti-tyoe. Niyan jototiya lari pansi jono jera miicayoe. <sup>12</sup> Lari popere jononan, oco jononan jera miicayoe. Duque ano tanocanan, ano mochi padeseinocanan, michi cala tanocanan, michi cala itonocanan jera niya jototiya podeiniyyoe. <sup>13</sup> Crístori lachi tencaca sonba suwanasari, niya-quetiya quino podeiniyyoe.

<sup>14</sup> Tsan josatiya nulari la padeseinaminchi cala cuwanato, duque seque quinaminlanue. <sup>15-16</sup> Nulari Filipos pueblobi chuminlari Diosichi sen fiquica miisiri, lachi epe cuwamin jominlae. La Macedonia tobi nechi calotusan, Tesalónica pueblobi canenasanan, nulari duque neca lachi cuwamin jominlae. Junsí Macedonia tobi nechi

manlonunbi, manan mancuwalaquee. Jun mate uyan Jesucristochi tsachi bolonla lachi cala cuwalaquitue. Nula miralarae nulasiri lachi cuwamin jominlayoeque.

<sup>17</sup> Junni lari nulabe tsanke cuenta quinatonan, nulaca fe cala cuwasaque tsantitiyoe. Junni nulacari cuwanun tenchi Diosiri duque ayudaichunae. Jun tenchi nula cuvacaca duque se joe tiyoe. <sup>18</sup> ¿Epafrodítori nulachibi nechi calaca lachica tanjaco? Junni lari ya calacari cato michi tayoe. Jera munaranunca tayoe. Junni nulari ya calaca lachi cuwanato, Diosichi epe cuwanun cuwenta quilaquinue. Diosichi uraran insienso cuwanun cuwenta jominue. Diosi junca se joe tichunae. <sup>19</sup> Junni nulari Diosichi tenchi cuwanan, yanan nulachi mancuwachunae. Lachi Diosiri Jesucristochi tsachilachi tenchi duque tae. Yari tsaracari senca tae. Junto nulari ti munaranuncatiya jera cuwaniquichunae. <sup>20</sup> Yari chiquilachi Apa Diosi joe. Yacari numatotiya tsaracari seque pato polentsan joe. Tsanqueri joe.

### *Saludo*

<sup>21</sup> Lari Jesucristochi tsachilachi saludo erenayoe jerale Diosichi tsachilachi. Jinsi labe pechumin acolanan, soquilan, nulachi saludo peerelaquinae. <sup>22</sup> Jinsi jerale Diosichi tsachilanan nulachi saludo peerelaquinae. Junni aman fe mantá tan miyachi tenchi trabajaquiminlanan weyanlari Jesucristobe penenaminla joe. Junni yalanan nulachi fécarí saludo peerelaquinae. <sup>23</sup> Miya Jesucristori nulaca

duque laquirato, nulachi tencaca seque cuidaisa  
rocainayoe. Tsanqueri joe.

**Diosichi Pila  
New Testament in Colorado (EC:cof:Colorado)**

copyright © 2012 Wycliffe Bible Translators, Inc.

Language: Colorado

Translation by: Wycliffe Bible Translators, Inc.

Colorado [cof], Ecuador

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Colorado

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 11 Nov 2022 from source files  
dated 29 Jan 2022

c0b9e96a-3f40-548b-a409-7170a22abca8